

UCSI, JPP memeterai persefahaman pendidikan

Oleh Basir Zahrom
basir@bharian.com.my

► Kuala Lumpur

Universiti UCSI (UCSI) dan Jabatan Pengajian Politeknik (JPP) menjalin kerjasama dalam bidang pendidikan dan latihan teknikal menerusi memorandum persefahaman (MoU) yang ditandatangani, baru-baru ini.

MoU itu ditandatangani Ketua Setiausaha Kementerian Pengajian Tinggi, Datuk Ab Rahim Md Noor diiringi Naib Canselor, Penyelidikan dan Hubungan Akademik Universiti UCSI, Prof Emeritus Dr Lim Koon Ong disaksikan Menteri Pengajian Tinggi Malaysia, Datuk Seri Mohamed Khaled Nordin dan Ketua Pengarah JPP, Mejar (K) Md Nor Yusof.

Md Nor berkata, pelajar politeknik telah mendapat banyak manfaat menerusi MoU terdahulu sama ada dalam aspek artikulasi, tempat latihan industri atau pemerolehan persijilan industri dan profesional.

"Diharap pelajar akan menggunakan peluang yang terbuka dengan adanya persefahaman ini untuk memperkayakan pengalaman pembelajaran mereka semasa dalam pengajian," katanya.

Perkongsian maklumat
Menerusi memorandum itu, UCSI dan JPP bersetuju


untuk berkongsi maklumat dan pengalaman dalam usaha penyelidikan, kurikulum dan pembangunan perisian bagi pelbagai program.

Kerjasama itu sekaligus mewujudkan peluang yang setara dalam kalangan pelajar politeknik dan dijangka akan meningkatkan mobiliti akademik antara warga UCSI dengan politeknik.

Mengulas mengenai kerjasama itu, Mohamed Khaled berkata, beliau yakin MoU yang dimeterai itu akan membantu proses pembelajaran pelajar politeknik dan dalam kerjaya mereka seterusnya.

Sementara itu, Prof Lim berkata, universiti memainkan peranan penting dalam melahirkan graduan berkemahiran di dalam sesebuah industri dan beliau percaya kerjasama itu ialah contoh terbaik bagi menunjukkan bagaimana institusi swasta dan institusi awam mampu bekerjasama.

Katanya, dengan adanya MoU antara kedua-dua pihak, ia diyakini mampu meningkatkan taraf pendidikan teknikal dan vokasional yang akan memberikan manfaat kepada negara.



Mohamed Khāled menyaksikan pertukaran dokumen antara **Ab Rahim** (dua dari kiri) dengan **Prof Lim** (kanan) dan sambil diperhatikan **Md Nor** (kiri).